

四庫全書

集部

欽定四庫全書

集部

西河集卷一百四十五至

詳校官編修_臣曹城

助教_臣常循覆勘

總校官庶吉士_臣倉聖脉

校對官編修_臣馬啟泰

謄錄監生_臣夏清和

欽定四庫全書

西河集卷一百四十五

翰林院檢討毛奇齡撰

七言絕句八

懷友

雪滿空山夜未分
燈花初落酒微醺
不知良友何時別
野寺鐘殘一夢君

陪益都夫子長椿寺觀劇奉和原韻

春色融融起化城
棟花風發坐來清
當軒一奏開元曲
滿院如聞上苑鶯

二

香臺深處散朱筵
梵唄時傳梵率天
花外莫驚歌吹發
謝公舊墅近東山

三

沐日追遊古道場
宜春妙伎進多方
慈恩原有金錢會
錯認新聲奏太常

東朝房閱

廷試卷

左闕門通曉禁春晴牕日上水流銀桂林多少名材在
誰是東堂第一人

二

芸臺應台共鳴珂

聖主臨軒事網羅爭道目中無五色掖門花發彩雲多

奉和李使君行衛即景十詠原韻

重重春色鎖長橋，萬柳參差覆石壕。
欲上隋堤南去遠，教人空憶廣陵濤。

右衛河
傍柳堤

汶水遙從天際迴，商船半向夕陽開。
長帆一帶秋光裏，甯母亭邊片片來。

右汶上
帆來

風迎翠蓋碧亭亭，響滴荷珠靜夜聽。
恰是梅崖讀書處，藕花香畔誦金經。

書院與古寺相
接梅崖使君字

右書院
荷花

拏攫霜天龍虎姿
林間石闕未銜碑
儘教釋氏經行後
猶似宣尼手植時

右南
林檎

晚風吹雨送江舟
傍渚斜臨百尺樓
過客莫歌羅嘖去
有人望遠在樓頭

右津
樓

瓠子長流散澤陂
朝來顧免眼迷離
誰言東郡驅車日

不是南樓理詠時

右曉
月陂

寶地紆回水一方
白沙紅樹兩茫茫
岸傍一座金輪塔

長帶鐘聲伴夕陽

右塔岸
鐘聲

鳥散空林靜遠鐘
雞聲茅屋曉烟封
遙看天半瓊花發
知是高唐第幾峰

右平岡
望積雪

荒原凸凸似龍堆
薄暮携筇去復來
自昔坐看雲物後
寒葭吹出萬重灰

右反山

纔過東村日欲斜
停車到處問桃花
看來紅廟支竿處
便是黃公賣酒家

右東村
酒帘

吳冠五自上黨還重赴渭南

雪夜宮鶯啼滿枝
平臺水色綠差差
此來不作橫汾賦

只為新看上黨詩

二

上黨詩成天下驚
春風重送渭南行
王孫無限天涯路
愁見車前細草生

題金十四娘畫像

柳絲垂處綰成絲
綠汁還堪染布袍
欲識胸中羅八斗
何難頰上畫三毛

二

京洛重違已十年披圖相對笑依然園花開盡東風裏
猶把殘書坐石邊

數過任黃門邸舍看菊留三絕句志感

秋到園林歇衆芳
罇前相對一霜蒙
老來自信無顏色
誰道秋花晚更黃

二

紅白高低一色栽
闌干上下幾層排
屢從西掖看花去
可似東籬載酒來

三

三過閒堂倒玉卮團團不落使人思
秋風幾度催霜盡猶自低頭戀故枝

題沈客子春山絲竹圖記年

坐擁西園絕代姿風前吹竹又彈絲
縱教瘦盡休文面尚似東山年少時

二

為聽吳興舊妓童身披鶴氅坐當中
宛然人在天台路

萬朶桃花夾面紅

同館茆君以母訃奔宣城

仙姥新遺七誡篇
芸臺有子泣花顛
祇憐化鶴無由到
難奠生芻在墓前

二

翩翩丹旄引雙鬟
愁見鱣魚江上還
欲望故鄉何處是
白雲飛滿敬亭山

奉題張學士賜金園圖

有序

康熙二十年張圃翁學士請假歸龍眠以

上所賜金割其半買園構四軒其中名賜金園同邑姚
耕壺繪圖傳之越三年

上召學士仍入供奉暇日出圖索同館為詩予賦八首
續畫卷後

買山何用費追尋洞壑長街

聖澤深但得繪成千嶂碧不須還散二疏金

二

浮峰東下水灣環彷彿鷗汀傍鹿闌當識此中橫榻處
有人紗帽坐花間

三

圖成誤筆點垣衣賜號逍遙看去非日侍禁林還記取
李公崑下好開扉

四

黃金築室四軒通不羨編錢馬埒中南汴岸移春漲綠
西廊壁掛夕陽紅

五

還朝無俟乞官湖遙指東山意自娛當日汾陰陪祀去
可曾詔繪草堂圖

六

芳塘低處著闌干村女提壺近井榦只恐
君恩難遍及故留圖畫與人看

七

平泉築館莫嫌遲況值黃金未鑄時離竹已抽前度笋

山花又發隔年枝

八

前軒竹樹手親栽
富畔春風度幾迴
一自西清重

詔入畫圖一日百回開

題畫松為姑蔑使君生日

澗水東流皂蓋迴
九龍山峻徂徠長
松偃蓋垂千古
疑是東方千騎來

二

謾謾風生五粒鮮
郡樓開處起朝烟
他時廟廟搜樛櫨
看汝長檣天漢間

題蔣生畫像冊子

青桐花發最高枝
一縷茶烟裊似絲
中有杜陵三徑客
金雞石上坐題詩

二

月旦新從入洛還
重携仙驥扣仙關
竹山芹澗應難覓
何意相逢巖樹間

為雲間沈白書賣文字約後

蕭寺兩書當百鎰長門一賦值千金慢誇此日朱提貴
載酒龍鶩何處尋

任青嵒七十

曲巷蕭條近市廛白頭遺老尚依然尋花曾飲鄉人酒
扶杖相過又十年

二

栽迴甲子度春風又見園花歲歲紅幾欲移家歸海上

還來避地住牆東

三

先生七十正懸弧
長對青宮舊畫圖
恰似涓陽歸載早
海黿百尺掛珊瑚

壽友

截窠金門寄此身
翛然更隱得仙真
何年再與西池會
笑對桃花萬樹春

二

層巒縹緲度雲璈玉露遙分碧海濤日出曉霞紅爛熳
有人闕下獻仙桃

汪園水亭觀荷同佟二公子靳吉明府張文學

于康暨汪傳二進士即席

水亭開處晚荷鮮水面紅橋似輞川賀老段師俱在坐

可能還唱想夫蓮

時座末工伎樂者九人皆老供俸也
想夫憐原名相府蓮憐蓮字聲之

設

二

荷花傍檻卷成卮樹裏殘陽欲墮遲怪底新歌吟未了

西園公子正裁詩

修公子詩先成

送修公子鍾山赴其尊大人江南行省和靳允

安韻

莫厭河亭暑退遲秋風又掛布帆絲懸知阮緒寧親日

正是崔從出鎮時

二

多君作賦本天才況復船裝書畫回

公子擅書畫詩三絕

此去登

臨儻乘興停船一上妙高臺

三

但向河橋嘆執袪深憐一載對門居回思當日相逢處
尚有孤山道士廬

四

白門秋到雁初鳴落日浮雲看上征應念故人難遽別

雅琴休作雀飛聲

時有鼓琴者在座

董生杖履圖

縫荷躡葛興翩翩帝里相逢豈偶然我欲邀君柳市去
杖頭添掛百文錢

二

虎頭妙筆費尋思襍綴衣麻並履絲別有示人阿堵在
青青兩眼向天時

關中沈君為覲親晉安值亂未達遂客死吾越
其子扶柩西歸過別挽之以詩

先生家世本秦關萬里趨庭客未還一自巫陽招謝後

靈旗長駐會稽山

二

諸侯博士老平津曾向天街振履塵到死難忘甌越路
先人兵備在南閩

三

遺書萬卷好重編有子賢名過彥先無數道傍虞殯者
為君時誦露晞篇

同姜京兆寓繆修撰園吳江徐松枉過闕候有

詩見謝依韻奉答并以代訊

名園畫鏤不曾開
門外輕車碾綠苔
自失呂安河上去
從無太守雁門來

二

梅花初發武丘東
兩度尋君古寺中
聞道談經曾不住
我來何處載鄆筒

沈篤人母陶太君壽

錦帔垂垂罽繡梳
宮袍初試舞來遲
遙知綺席傳觴候

正是泥金報喜時

二

朱門旦啓勝朝霞
流水街填畫轂車
一自春風張錦幔
滿庭開作武陵花

三

東皇西母鎮逍遙
長見青裙戀翠翹
只為金門饒曼倩
當軒一奏白雲謠

題李木庵太史早朝圖

宮鵲初飛曉禁開
常參班裏幸追陪
一枝樺燭籠烟近
認是蓬山李嶠來

二

金華入直早涼時
長探牙筒索口脂
今日畫圖相盼處
教人頻詠上官詩

藩伯李公從貴州遷浙于其初度飲次賦呈四
首

從違馬帳一趨丹
羅賴朱旗相送難
何悟紫微環照處

重開行省到臨安

舊以方伯為中書行省名紫薇署公初從杭遷縣故云

二

屏藩高啓浙河清
河上應留三過名
當日驛樓題詠去
到來惟有碧紗明

三

槐堂相憶嘆華顛
建節龍番又七年
圖就五湖還有待
鶴飛莫近畫筵前

四

鈴閣斜臨湖寺東
兔葵長掩壽王宮
祇因前度劉郎在
尚見桃花雨後紅

丁禮部舉子

茗華終喜出藍田
隔巷忻看佳氣連
為赴葯園湯餅會
桂枝先發巷門邊

二

莫嫌三美不同期
老蚌生珠尚未遲
不信蟠桃須晚熟
請君一誦播州詩

劉禹錫贈樂天詩有
海中仙果子生遲句

東華門遇瞿庵和尚感贈

蓬池萬頃接天開，曾作紅樓大辨才。
却自曇摩歸沈後，謂平陽也禁林不見此僧來。

二

東華日撲軟紅塵，雪後長思鑑水春。
忽對沃洲山下客，恍然身遇故鄉人。

題方山子畫像冊頁

十年相憶在江湖，讀盡焦雲百種書。
方山所著書名今日相看

同一笑南高峰下舊精廬

二

一卷楞伽石上排日高雲影落香臺分明一個方山子
畫作維摩入座來

題張鞠岑吏部年伯採菊圖記年

淮干一別意惘然十載相思會面慳何事虎頭纔寫照
便令張緒記當年

二

先生高臥在東山乘興東籬採菊還此日旁求遍天下
有人圖畫入品間

三

東湖九日共題詩座滿黃花酒滿卮畫裏不知年歲改
看來猶是醉吟時

題丁灝秋江獨釣圖

秋風嫋嫋竹竿長紅蓼花開傍夕陽一自洞庭垂釣後
至今不復咏滄浪

先生新從南
嶽還故云

二

七里灘前楓葉紅
桐君江上釣臺空
身為鄴下文章客
也著羊裘臥澤中

送黃徵君虞稷喪母還里

黃香辭辟不嫌頻
只為高堂有老親
誰道徵車二千里
頻亡惟舍百年人

二

北闕何須再上書
見星前路舍羣魚

聖朝教孝原無極忍使泉臺更倚閭

時有謂徵君
宜疏辭故云

三

寒風梢槭下林柯此去冰堅好渡河
痛煞望鄉行哭處
蔣家山下白雲多

四

生芻一束路漫漫送子將歸欲別難
只恨毛生亡母後
依然捧檄在長安

易亭贈楊筠和董四場

楊柳垂垂覆遠汀
楊烏方註太玄經相過永日開
蹲話能使薰風滿易亭

二

綠城一徑柳淒迷
柳下談經手重攜
第弔忠文過茂苑

那知楊賜在關西

忠文係維斗先生私謚其孫也

平太翁初度

載問次山尊人也

芝蓋如雲棗似瓜
秋風八月桂為槎
原來河上神仙宅
只在懷州刺史家

二

著書何必向幽關避世牆東也駐顏不信但看樊仲父

火珠橋下九還丹

先生所居
名火珠卷

三

先生寄興澱溪邊暇日長吟東峴篇八月秋花開似錦

萬層羅綺滿前川

四

近見耆英在鑑湖閒來挾瑟且提壺庭前自有三珠樹

座上寧無九老圖

高士母壽

莫問三山與十洲長離應向碧梧留海門紫氣橫千尺

中有君家文選樓

士選文
行世

二

清防華燭接明星七誠由來抵一經莫怪高堂將八十

達夫五十早知名

西河集卷一百四十五

欽定四庫全書

西河集卷一百四十六

翰林院檢討毛奇齡撰

二韻

即五言絕句一

王孫遊

桂樹他鄉少王孫故國稀天涯春草遍處處待人歸

排遍

曉月三關落秋風萬里來將軍開馬邑戰士下龍堆

舟行望九華山

溜水下江關輕帆天際還望中雲欲滿知是九華山

晚泊二首

晚泊大江沙烟生紅蓼花船頭鳴賽鼓船尾飼神鴉

二

紅蓼垂牕暗青楓接岸平村翁迎舶語還問下江兵

無題

燈下裁遠衣堦前墮秋雨為惜藁砧名遲回下雙杵

苧蘿村

西子吳宮去溪邊少浣紗綠蘿相伴女空自貌如花

二

苧葉風吹白蓮歌水面寒前溪花滿地不敢過溪看

陳肇曾孝廉歸閩詢周六玉輪

夫君歸閩海應上越王山東吳年少在為問幾時還

漢宮曲

漢苑高如斗天星出似瓜後庭千種色前殿九衢花

二

羽騎長楊苑靈臺太液池六宮新位號最貴是昭儀

摩多樓子

三秋行保塞八月詔移軍近見沙如雪遙看陣似雲

二

八月天山雪沙場蚤見寒迴看雲盡處秋日滿長安

江行聽潘六絃子

不聽桓伊笛翻催趙壁彈三絃纔一曲看過幾重灘

飲陳吉孫宅適紫蘭當筵盛開客有寫生者率

題其上

共就陳遵飲當軒樹紫蘭問誰圖茜影留向醉中看

二

灼灼流霞杯臨風映芳藥移之上雲屏滴作紫泥水

看伎

曲水園頭伎扶風帳裏名

中州馬端
肅家姬

一看西子舞重起

故鄉情

麗湘

蔓草生西苑殘花滿洛陽清涼臺下過尚有一麗湘

北行口號

春風生馬頭春雲生馬尾不是春雲生知是烟塵起

二

美人乘騾車相顧烟塵中新花著輕霧脈脈花影紅一本

作對面烟座合高車錦幔斜
分明輕霧裏一顧道旁花

早起

勿作還鄉夢徒增逆旅情中宵驢鐸響早起趁前程

為趙司馬題五雲移棹圖

曉日虔陽樹秋風贛水船片帆橫北斗看入五雲邊

二

綵鳳橫天去蒼龍倚棹開漢庭雲滿處知是趙熹來

古意

醉裏能留客愁多最滯人誰將三婦豔歌作大郎神

上田花

青青上田花朝日揚花英路逢折花人見花不分明

二

折得青梅枝送郎渡河許花落子始結郎今未知苦

輪臺歌

大漠三秋草輪臺萬里榆天邊新屬國塞外古單于

綵花歌

莫翦昭陽綵良人本麗華能將半面色散作四時花

熊兆

曰漢女職
有良人號

塞下

燎燭照秦關將軍夜臘還寒更刁斗靜飛雪滿陰山

二

金矢玉花翎沙場舊有名一歸光祿塞三上李陵城

古塞下

烽火甘泉月旌旗灞上雲漢王能奮武偏台李將軍

小長干曲

小小長干下相逢擊絮人春風吹綠髮春水濺朱脣

二

風發南湖裏蓮舟去漸稀阿儂因有約須趁暮潮歸

題張君畫像

紫石環修竹丹壚煮玉尊葛巾相對坐知是曲江人

查繼佐客淮復買小鷓鴣頭自隨短句為壽或云

嘲焉并命鷓鴣頭歌之

莊生本蝴蝶日日宿花裏釀得黃粉兒欲寫白毫子

熊兆

曰李白有淮南小山白毫子歌仙人也

二

小草萼俱綠寒花蒂亦香
鼓鐘淮水上水落自湯湯

三

團團桂樹枝能令八公還
捲幔拂螺子分明見小山

四

淮王是佳名碧玉是好影
後園金井牀前頭素絲綆

五

舊部能吳舞

查舊部
妓數部女

新人解楚歌楊家龍舸過無復

唱開河

六

擘破真珠樹分成結綠釵漫遊無限興只看酒如淮

絕句

買得長門賦盛將綠玉箱春波涵太液浴盡野鴛鴦

採芝三首

欲向商山隱還尋瑤海來玉田三百畝祇見一花開

二

深谷原無種齋房舊有歌九莖連四葉葉葉奈愁何

三

玉殿披圖晚瑤林驂駕遲願將三秀草移取種銅池

羽林郎

扈從獵長楊彤旌豹尾黃當車能搯獸道是羽林郎

宿傳一新溪上草堂招憲臣

竹短溪亦淺月明山正深草堂前夜雨思汝到如今

錢清江和韻

北熊曰此唐張仲素春江曲韻也宋王兵部錢清江掘石亦得此韻故稱

和韻觀詩意謂

錢清江已湮耳

三月正陽春中流共採蘋
妾居江下久不記上江人

來生過訪余適游陵下
不值却寄

泛水尋瑤牒登山啟玉書
到門無鳳字去路有羊車

二

挾彈還清洛橫琴過大陵
蒹葭難倚玉展轉媿毛曾

嘲採蓮者傷其遲暮不能已而坐得困也

綠水浮來淺紅蓮採去遲
衣牽殘梗刺權結野菱絲

古別離

綠殺門前柳空言似畫眉自從折柳去螺子不曾施

覽鏡詞

漸覺鉛華盡誰憐顚顚新與余同下淚只有鏡中人

二

皎皎金鵲光熒熒紫菱色為理雙雲鬟垂首作轉側

江行絕句三首

欲上螺磯廟空憐神女嬌長江秋晚後日日有風潮

二

彭澤江邊石行人說馬當片帆吹浪過不復數瞿塘

三

采石橫江浦當年起戰爭至今江上路尚有舊軍營

聽吳歌有感

少小經吳會吳歌一棹行五更殘夢裏啞吶兩三聲

二

落月寒林鳥明星野浦雞榜歌遙倡和春思隔江迷

三

晚歲雞塘路秋風鴨嘴船
吳娘纔引曲雙淚枕函邊

露舫祠

行露多蔓滋委身貴能早
修黛揚綠烟羅裙裏青草

二

日炤銀書榜沙銜石闕詞
高郵州上路爭認露舫祠

上滕王閣

避地尋江表看山到豫章
何王登此閣千載在南昌

重登滕王閣

柳色春城霽風光南浦新
憑欄愁騁望猶是賦詩人

白洋河道中

燈火春宵盡鞦韆上已過
馬頭殘照裏又渡白洋河

予經歸德城女牆塌地埏埏如丘樊與同行者

下馬賦詩

睢陽一丈城半為賊所拆
我今過睢陽城板高五尺

二

汴水方流漫黃流怒未平張巡空塚側截截半竿城

晦日

村店開紅杏溪橋漲綠蘋途中逢晦日思煞故園春

途中絕句

未上楊家集先過棗樹林棗針能刺手莫繫白花驄

哭江陰楊生

抱器無成日多情憶去時君山明月夜何處不相思

二

水落看予度霜清別汝寒年年驥亭北花發滿闌干

達曰

楊別業在暗沙名驥亭

楊白花

楊花不如人隨風任東西願教雙燕子銜作梁上泥

長安道

長安十二衢日日走車馬那堪主父偃日走車馬下

二

九曲環秦甸千門啓洛陽宮前馳馬巷城北鬪鷄塲

洛陽道

洛陽故都城輓轡絳長綆但見白玉欄不聞綠珠井

全諸公集吳錦衣宅雷雨邀妓不至

高會錦衣堂春宵雨萬行油車何隱隱只在葛山陽

二

東海安期夜西堂道助樽燈前雙舞鶴不復下雷門

三

玉聲春前雨金吾殿上才天街曾勅燭呼取念奴來

咏雲嘲友

捧日遮嘗滿隨風結轉濃終朝嫌似狗何日好從龍

塵

但恨車前少猶憐甌裏稀日光流壁隙一道雨絲飛

同聲歌懷友作

繡帶粘香薄紅綿著粉銷願為羅袜子長束謝娘腰

二

團扇函秋冷屏山掩曙寒願為銅鏡子早晚自相看

熊兆

曰同聲歌云願為莞弱席在下蔽
匡床願為羅衾隣在上衛風霜

咏枕記事代友四首

弱莞流雲薄香羅刺面新小鬟時抱與真見洛川神

二

繡裏封花絮湘紋浹粉膏不知結束苦看取抱持勞

三

誰作通明製裝成八寶餘中郎多秘語藏就一函書

四

警夜攜來苦遊仙夢自疑芙蓉繡兩面那得並頭時

題畫幃

綠幘粧野花青檻倚山石欲煮黃鸝羹舉頭看秋色

題畫像渡江圖

水瀨看成線荷花卷似杯道人何處見記得渡江來

二

道人欲渡江荷花滿江沚坐將花片來影落一條水

遙題梅聖占像

何處逢梅子蕭疎一布袍相看無語笑白眼向青霄

題畫

孤桐抱山丘榮期坐其側為有清風來泠然枕危石

病起贈李君

自愧無金骨終年苦鉢腸少君良厚意飲我葛陂漿

二

七十懸壺叟函關舊著書只今懷玉藥猶識李公居

三

誰療糾宮襍應憐洛市還火珠橋下路方篇九還丹

李住

名火
珠橋

漢邊思

漢軍屯句注邊馬渡陰山羽書飛上郡烽火達蕭關

二

蘓武持旄節夫人下錦車甘泉呼保塞非復舊休屠

隴上歌

不見隴頭水但聞隴上歌歌時雙淚滴可是隴頭多

採蓮曲

蓮葉將衣綠蓮花比面紅採蓮蓮已盡別有採蓮儂

二

採蓮愁日暮舉手攀荷枝荷珠如淚滴是妾憶君時

醉中語妓調宋三

吹笛唇脂落彈絲腕帶寬背人重料理莫倩宋三看

蘭溪棹歌

春水碧泱泱春蘭覆水香中流不用棹直渡浦江陽

泊牛渚有感

夜月橫江思秋風牛渚情舟中無謝尚誰聽咏歌聲

江行無題

落月石帆隈孤篷曉未開岸浮移纜上知是早潮來

二

泛水浮新葉流波漾東蘄可憐江口月不共故園人

三

水國蒹葭老江城橘柚香烟中同醉起惟有櫂船郎

四

山雲低復起江鳥去還飛
借問舟中客何時可得歸

五

風起泊江臯江聲徹夜號
不期鄉夢遠猶聽浙江濤

送黃媛介令子歸伊舅氏

王粲登樓日曹昭作賦時
將歸無限意只在渭陽詩

羅噴曲

染絲作帆絳收拾帆子迴
鍤石裝篙頭下篙莫輕開

二

君買西地錦應須到蜀城蜀中春鳥語語語自分明

估客樂

朝望襄陽商暮望真州估不如隨販兒朝暮拾錢數

二

鐵鹿須東下蒲帆莫上牽那知上江女也望到家船

稍婦

稍婦立棚子蕩稍清江濱故自稍輕橈迴頭不看人

二

夜起風水惡早梳弄船子聽歌如有猜微笑入烟裏

書壁

有序

遇桃二枚臯里中從珠湖會也重九日復集雲起閣
曲江主人扶醉再攜榼蹋歌同過桃家乞書二絕句

于壁

菊殘分燈暗葦門繞路斜鳥啼深巷裏巷口是桃家

二

燭下憐紅粉
霜前墜白榆
官街戍鼓靜
愁煞夜啼烏

西河集卷一百四十六

欽定四庫全書

西河集卷一百四十七

翰林院檢討毛奇齡撰

二韻

即五言絕句二

漾水曲

漾水前溪漲橫塘
取碧痕拔蒲塘水上
那得見蒲根

朝來曲

朦朧捲羅幙
微坐若有憶
睂際生曙光
髣髴見容色

史憲臣曰朝光
容色相接生艷

二

宿露滋花葉殘星墜草叢東方纔放白西壁又生紅

絕句

絡繹纏絲苦青綃與絳綃如何春汛遠不及上江潮

二

宋子新秋意胡姬遙夜情金槽曾壓酒點滴記分明

戲作麻姑獻芝圖并題為白母壽

不向吳門去新從滄海迴
倏然雙鳥爪摘得紫芝來

聞蟬

碧葉吟風細青枝吸露涼
桃笙初睡起愁聽一聲長

二

嚳嚳臨粧閣微微曳晚風
佳人雙鬢薄不復挂青蟲

翻和宮詞

有序

旅悶咄咄一壁舊粘王龍標
昨夜風開宮詞呼旅主

人兒有文者屬截離翻接
移七作五妄名翻詩

兆熊曰已

連勿連已偶勿
偶見五律卷

較詩牌為妙愛其給捷率接春風夜

月露桃寒井諸字而略未成句予便為成之使渠唱

云夜月開宮殿春風舞露桃承輪寒井外新賜錦簾

高姓和云

月殿承歌寵寒袍賜錦新簾前風舞夜井外露桃春

守歲

何處懷家苦他鄉守歲時長將一夜坐并作兩年思

二

守歲逾終夕鄉思度萬山家人應蚤睡恐我夢中還

臨川水

臨川石上水是我清淚滴激激流草根宛轉看成碧

二

臨川灘上水是我清淚流一灘一日上日日上灘愁

寺東廊見叔夜詩

古寺經行處香烟滿上方同遊人散盡猶自佇東廊

謝舒漢文贈佳履名酒

翦毳紅籠襪傾雲綠滿杯羈愁如未解乘醉踏歌來
劉琨餉法酒諸食物

釀花開螳蜋臃食進羊臄既醉應忘客臨餐轉憶君

花橋鋪

碧草馬蹄遶春衫繫柳條看花長下淚不敢過花橋

除夕有感作

臘管莫教催椒盤次第開恐將除舊意看作望新來

三月晦日

姑洗將移管清江未浣衣如何羈客路又復送春歸

二

九十春光盡三年客路遙黃鸝江柳上啼殺是今朝

施愚山先生貽書曰黃鸝江柳上啼殺是今朝千古斷腸語也

刺促詞

黃金長被毀白璧苦遭疑但詠流離子無歌刺促詞

沐浴子

沐冠棄蘭澤苴履藉蕙草蹴蕙徒自傷采蘭不言好

山居雜詩

朝日東林靜
新秋北砦清
螳螂衣上落
鳥雀路中行

二

溪靜聞滴葉
山空響落橡
微風裂門紗
宛在剪刀上

三

林菓堪時摘
山家偏晚嘗
收儲需夜雨
剪栗待秋霜

四

多難親朋少
長遊內侍稀
東林女道士
替我製秋衣

五

楓落林斲紅草疎路微白墻低落澗光門靜入山色

六

杉路雲停過茅堂煖入來幙竿看日影西去又東迴

兆熊曰西河每坐視日影
東起西落見別集文序

七

前溪深林花繆結滿溪樹採花入林中始知有人住

八

女冠不出林忽採鐘乳碧昨日青苔間驚見履絲跡

九

夜夢同張五前溪一汎舟莫嫌猶是夢醒去幾曾遊

十

伐棘圍作籬編茅織成屨種花不知名採藥當認葉

十一

落花流前溪溪石擁花住浣女不解愁素指撥流去

送倪菑東歸

有序

送山陰倪酋將東歸憶酋之先有孝子仙溪公侍母
痛心疾每痛叩頭嚙指流血出求伐百計不足為療
有道士告木心石當可自百里內外冬春晦明隆寒
毒暘入溪山覓伐材者跪候之如是數年有伐杪樸
木候之逮晡鋸聲急叩頭曰此中有石幸丐末人已
果然疾由是療石圓如鳥雀卵中色正白著木處燦
爛如黃金會稽陶學士大臨陶少司馬譜王大叅泮
山陰趙文學旬皆有記傳曾屬予序之未報也今送

齒時自痛輕去墳墓羨齒之反桑梓地得孝子之意
因未及之且誌梗概以為引者焉

把酒驛亭西春風送馬蹄愁君歸去路草色正萋萋

二

我尚羈江表君先返越州故人如訊及道我賦登樓

三

倪子擁烏裘幡然作歸計碧雲生長途黃馬去蕭寺

四

君是仙溪後當還孝子闡王陽長在道送爾一沾衣

過上陳店

夜雪不能寐蚤行過上陳不知寒雪上盡是夜行人

江南雜詩四首

十里秦淮水曾經送泰娘紅船停淺瀨畫閣覆垂楊

二

聚寶門前路長干寺外橋市帘斜掛處山葉下蕭蕭

三

幕府重開後江亭飲眺還當時傳浪語安石卧東山

四

何處重相憶青溪小妹家種將烏桕樹噪殺白門鴉

林下口號

烏衣鎮西林林下路縱橫相逢採薪女各自拾路行

騎驢

騎驢聞雞號日出清沙東初出沙路白再出沙路紅

二

黃頭小踰驢日暮解宿處土棧橫草門一步幾回住

八角井

鋪南八角井井上雙轆轤左繩扳大婦右綆牽小姑

自浦口至潁城途中

浦口將帆落江亭對酒濃日邊明橘柚江上秀芙蓉

二

秋黍銜風響朝林壓露平紫游斜控去初過壽州城

三

馬上傾盃綠亭前獻菊黃殷勤無限意只記杜秋娘

題陸售記年圖

蓮葉裁為幘松風聽在林東吳推陸弟抱膝且長吟

二

碧樹移曉陰清神濯秋水誰使謝幼輿寫置品石裏

題畫為櫟園

雨過不放晴積陰濕林葉野禾生前圩蒸耳似馬鬣

二

山抹如螺碧波紋似縠紅帆檣崑寺外知在夕陽中

蔡州宿除三年矣飲次感賦

栢酒官齋宴梅花客舍情殘年除不盡三在蔡州城

走馬引

有序

潁城西六十里櫟頭店宿夜聽琵琶絃徬徨不寢過
請更彈數曲到明別去與同行相失於是躑躅作走
馬引寫其聲馬上悲吟聞者泣而過謂失路矣

潁州城西路路馬蹇且跼歌苦傷馬心行苦傷馬足

二

潁州城西路路馬悲且辛只因長失路能感路傍人

壽淮陰楊母

楊母真女師幽芬蔽淮浦我今淮陰來不敢拜漂母

二

庭下王喬烏天邊穆滿車願持三尺釣上母楚州魚

題張梧乘槎畫像

碧樹難栽屋清泉好濯巾相逢圖畫裏知是汎槎人

奉題王言憲使畫像卷子

先生青雲姿挺若干丈松置之丘壑間矯矯成游龍

二

少小飽文史說劍五陵下草成西夏書取將大宛馬

三

幕府開江左長藩啟建康人歸朱雀里家本太平王

四

我來謁先生夜宿歸田廬高譚卸紅螭誠有如斯圖

五

將採莊山金鑄成少伯像名垂四海間心在五湖上

六

不然買絲線繡作平原君祇恐赭脂女污此玄錦紋

七

一顧神骨俊再觀意氣豪分明瞻五嶽豈是畫三毛

日南至

今日日南至日南當北還如何南楚客只在楚江關

題麻姑擷芝圖為駱明府夫人初度

麻姑本神人曾到臨川山竹葉為衣帶桃花挿髻鬟

二

麻姑到臨川擷珮獻紫泥祇因鮑靚女能作令君妻

毛甡行湖東旅主人孟君依新檄禁客宿其少
婦鄧老秀請而可更為擷浣諸衣裝臨行傍
徨繫之以詩

瀨淺誰漂絮春寒有釣徒湖東鄧老秀為我進彫胡

兆熊曰宋玉賦主人之
女為我炊彫胡之飯

七夕望牛女翻截銀燭秋光冷畫屏一絕與旅

主人鄒君

銀扇畫羅輕螢光燭臥屏天涼牽小女秋夜看牛星

代答

街燭流水銀螢光冷如織撲扇看小星夜涼臥秋色

寄俞九十四文起

久慙滄洲隱還期汗漫游天涯相問訊誰不識韓休

重登釣臺懷大敬

達曰大敬先生號漁父

東望家何在西陵潮欲來祇因念漁父重上釣魚臺

二

誰是被裘客登臺一望間天邊垂釣處應念故人還

望南士不至

望門入秦望日日如望秦白日寢落盡吾思漁丈人

秋山送僧

曙旭啓杉關逢僧問八還白雲留不住相送下秋山

與何八十七國仁飲次書贈

但作他鄉飲從君不願歸祇緣行役久故國反相違

二

臨汝江邊酒已山署裏雲十年纔此會莫道不思君

長至語當壚鄧上

長至還為客開樽淚欲流勿言添線好客路轉悠悠

楊進士賦臣小盆松

萬粒小松盆龍孫又種孫石臺開寸壁蒼翠滿天門

就亭鸚鵡去而復返

脫鏤辭雕檻銜緇返綠衣隴山千萬里何處可言歸

鷄冠花

每遇秋花發傷心絳幘紅故園深樹裏翹首待墻東

留別駱明府

我愛駱明府西游汝溪曲來時秋風生去時春草綠

二

明府文章貴今來政事清江邊看渡虎署裏聽啼鶯

三

我與明府游習習忘晝夜吟詩出竹中飲酒醉花下

四

王生依江表豈不懷家鄉春江碧灘灘念此江水長

五

一日辭巴山十日不能決睹見楊柳枝俯首淚如雪

別黃吉

有序

巴城人黃吉給牲酒脯者四月日且時延牲所親友

朱三徐二十二輩作郊游其家愕然耳臨行估馬匹
齋糧送牲辭不得更為留兩日賦詩以別

策馬去江關春花照別顏臨行三繫馬不是戀巴山
黃吉送牲至石牛渡

天涯最難忘莫若石牛渡渡頭花樹紅是我別君處
聽子規

嶺外春雲合潯陽曉樹迷高安三月暮休聽子規啼
臘月望夕喜旅客翻王建翫月絕句云合望月

時常望月分明不得似今年仰頭五夜風中
立從未圓時直到圓偶感其言且傷時暮亦
為效作

望明常夜立時時得頭風從今望圓月不似五年中

二

時望不圓月望時常月圓五明今夜合直得到明年

吉州守除三首

但守新堞在母令栢酒虛他鄉有限歲又見此宵除

二

虬箭消殘夜雞鳴報曉春故園如祝歲應祝蚤歸人

三

昨歲留河外今來滯吉安年年隨斗柄此夕向東看

將度玉山悶宿旅亭翻王之渙涼州詞間遣

白楊一萬片遠度何間關不怨春城笛孤雲上玉山

又翻涼州詞別鄧上

玉山不須度關門遠孤笛春城萬柳間片雲一何白

舟夜翻張員外楓橋夜泊詩得姑韻

落月寒楓外江城啼夜烏霜鐘天半寺愁客對山姑

和送春曲

芳草茫茫路春光任去遙生年苦離別不復上河橋

二

日飲江亭酒誰來歌送春歌時雙下淚只有未歸人

天衣襍詠詩

并序

乃者久行思歸潛身渡江幾罹隙孽從張五宅轉投

入法華山天衣寺中觀李邕碑感東晉曇翼誦念法
華經有普賢菩薩化優婆夷變相覘堅道心遂棄
六牙象騎空飛去因名法華山建法華寺暨梁武實
徵惠舉不起昭明太子賜縷金木蘭袈裟紅銀澡瓶
赤貝留犁子西域阿育王女鑄金銅維衛佛像輸供
殿堂有張僧繇畫普賢菩薩變相供普賢臺門外半
月泉照見半月有雙烏棲宿天衣杜鵑花異他常種
逮明惠王重賜有千龍紫金架紫宮妃繡字法華尊

經并亡兵寇賴乾公從靈隱東渡卓錫茲地頓還故
觀公見甞握手類遠公之遇彭澤休上人之逢鮑昭
借宿禪寮為予幟釋晨暮鼓鐘因奉和乾公十峰詩
并易他蹟名天衣襍咏詩覽觀云爾

法華山

靈鷲飛來迴高僧誦去閒南朝四百寺猶有法華山

月嶺

明月生西峰幽巖桂花發舉手拈桂枝仰頭看秋月

普賢臺

竹院狔筐杳金臺影幃微前山風雨夜如見畫龍飛

望秦嶼

秦皇鞭石至遙盼咸陽宮我亦愛山色悠然一望中

半月泉池

蓮池像月弦見月與池等如何落萬川虧此半邊影

積翠峰

寺古雲容合山深翠色多收將龍女黛綰作佛頭螺

天衣

天柱開吳越神宮肇晉梁金衣頒太子華藏錫賢王

天女巖

碧草綠雲鬟翩韞下天女朝散三壇花暮行一溪雨

天衣杜鵑花

只喚歸家好還憐去國賒瑀壇雙淚落并作杜鵑花

伏龍坳

高座金輪轉當關鐵鎖重誰持天半錫來伏嶺頭龍

雙鳥

青山白項烏年年送雛去祇為戀丹輪雙棲貝多樹

客悶同諸公翻李白少年行

何年市鞍馬笑度金陵東游盡五湖肆春花落酒中

又翻王龍標從軍行

漢將在秦關征吳人不還月明飛萬馬陰使度龍山

寄趙明府三首

種柳山城外看花江縣西風流賢邑宰人說趙棠溪

二

每讀棠溪文臨風起懷想廬山千片雲片片集几上

三

海潤迴波綠江深愛日紅山陽車上客流涕謝滕公

月夜翻王建中庭地白樹棲鴉詩并作唱和

露白鴉棲冷秋庭桂樹花誰知明月夜無地不思家

二

誰地夜無月花中白露明家人今在望庭樹盡秋聲

三

花月無家在秋庭知望誰露鴉棲樹白不盡夜中思

四

夜盡鴉不棲地白濕秋露花庭明月中人家望桂樹

五

庭明夜棲人盡思月中桂誰知秋樹聲露冷花在地

又翻前詩原韻

明月在人家棲庭冷白鴉望中思不盡夜露濕秋花

二

冷月白庭花
今秋誰在家
夜明樓露地
濕盡樹中鴉

西河集卷一百四十七

欽定四庫全書

西河集卷一百四十八

翰林院檢討毛奇齡撰

二韻

即五言絕句三

題松陵文石師樗隱卷子

曲轅有櫟社其樹能蔽牛匠石不一觀散之松陵流

二

道人宿蓮花夜臥若蝴蝶若遇南郭生何必示枝葉

嚴藕漁與王武合作畫扇藕漁畫杏武畫竹

君家有名園花開若金谷徐熙與黃荃各自寫紅綠

二

淇苑青簷發東林紅杏開春風吹半面折取一枝來

題何使君望雲圖

朝解會稽章夕盼山陽廬頃刻不得前寸腸如轆轤

二

辭郡多賢名幾欲奪禮制清風起衣間白雲在天際

三

綽舟并臥轍千載見圖畫何如望雲人
泪滴畫圖下

張恒像

別字
北山

我愛張北山讀書抱絕悟揮羽坐深林
不入大航渡

二

酒朋興何減詩格峻莫攀流雲如波濤
動盪胸懷間

吳閭儂歌

阿儂住揚州不若住吳閭前樓姑蘇臺
後園脂粉塘

四日吟

舊傳淮俗嫁娶用大禹辛壬癸甲四日

只盼辛癸至圖作千年歡何悟別離此只在四日間

題像

但到深嚴地

翰林院後廳書丹地深嚴四字

長逢著作家取將夢裏筆

寫出院中麻

二

蘸筆支玄玉鋪茵翦綠蕉槐廳書敕罷放眼向青霄

題何君畫像

刷髮決蘭蕙開顏生芙蓉披圖一相對有似何敬容

二

久擅三高譽曾聞第五名冰壺携處曉山石坐來清

三

廬江有高士覆幘把玉笋橋枝生堂前芝草長庭下

四

濯濯王忱影我我和嶠身寫來松石上一見一相親

送楊臥之豐城訪周明府四首

揚舫下柳浦散轡迴椒丘祇為思雷令時時望斗牛

二

豐城有遺劍聞在龍門山君往試探之當令莫邪還

三

洗馬將渡江芒芒百端集曾與彥輔譚清潤似玉立

四

少小才名重賓朋款宴稠石門雲起處應上劍江樓

傅大四十飲次

自入桃源路于今十六年故人今四十醉我蓼花前

過童君店

雨後童君店停驢一問行鞦韆雙女下欲答不成聲

孟山

旅宿斟珠酒同行贈寶刀孟家山下過須避此中豪

渡遲村二首

風急水波昏漁家晝掩門前庄不可宿買艇過遲村

二

夾岸柳毵毵菱根繞曲潭
遲村湖上過彷彿在江南

姚文焱舉人畫像

聞譽仰高躅披圖識令顏
置身白石裏託足青雲間

二

鳳德攬有神虎頭畫不俗
魁梧過張良倜儻類方朔

三

獻賦還江表看花憶上都
手中玉如意似欲擊珊瑚

雯水師像

百尺青松絲一枝紅杏子萬象獨露機得此畫圖裏
師在南嶺時得萬象之中獨露機句

二

老僧袒右肩結跏在危石東渡何所聞南嶺似相識

三

如意指揮去天花滿空山當年叅石雨曾坐天花間

師叅石雨和尚
天花寺

花燭詞為郁雲山作

鳳凰鳴鏘鏘從來協懿卜雄鳴聽三三雌鳴辨六六

二

嘉禾發珍圃祥蓮產天池駢華與並蒂總作連理枝

三

九光燎不滅百燼花自繁不識寶炬高看取雙銅槃

四

却扇難再藏施螺未全拭焰焰華燭光有人伺容色

送蛤上人住黎里羅漢寺

披衣辭越嶠飛錫下吳關何以贈君行白雲相往還

二

上人絕凡流好住湖水湄經傳五門子花落七條衣

三

君曾住湘溪蓮花滿溪沚借問湖上蓮何如在湘水

四

黎里有故人聞在雪灘住他時杯渡還應過釣魚處

吳江顧茂倫名雪灘釣
叟有贈詩見七絕卷

寄贈梅古愚八十

因攬雞山勝曾隨鹿幘賢
斲輪方七十記得十年前

二

綳帙藜牀展青裙
菰葉裁長安舊游子
猶俟杖朝來

三

宛上多哲行丈人
饒古風千秋老梅尉
八十面桃紅

宣城有
千秋嶺

題畫

柴門眇何所薄暮幽人還夜霧散林隙秋蟲吟樹間

曹生彈琴圖

陳思本驚才高坐彈絳綺就聽寂無聲聲在圖畫裏
為同年李漁村侍講題把釣濯足圖

我友負古貌放情在山水肺髮蒼崖間濯足碧流裏
二

生平號漁村其志不在漁手拋一竿竹胸貯萬卷書

三

布水盪若雲目光簸如電千載素心人開卷一相見

四

交友滿天下旣乃得此人何當放瑯琊同釣滄海濱

書郭生嶺表詩卷後

龍海看雲客羊城返道人葛洪携笈遠陸賈著新書

二

欲問羅山好行將柳述俱題詩當錦石得句似明珠

夜宿阪上草堂同南士作秋風起隣園詩傲韓

孟體

阪上在山陰
堦南有王氏別業
今圯

秋風起隣園移過阪上桑

南士

早起視阪上黃葉滿草堂

姓

二

秋風起隣園槭槭在屋角

姓

隣女紡木棉秋雪夜半落

南士時有隣女守
志苦織作不嫁故云

雪夜宿阪上同南士做韓孟體聯句即事

夜擁阪上絮恍卧清水裏

南士

早起見雪花拋落若鷺子

姓

二

竹折帶鴉墮
牕白先雞啼
姓布絲織門隙
認作隣女機

南
士

姜京兆七十友人索書幃為壽

京兆乞身早
還林不記年
違時懷柳下
竟日坐花前

二

香山七十翁所會非舊友
君今對飲者尚有元共柳

三

三萬六千日強半彈指過十歲一捧觴何止限三度

題同年汪宮坊讀書秋樹根圖

終日削汗簡不若對珍樹秋山枳句間中有讀書處

二

橙林倚絕磴直下清流泉呼童淪雲膏把卷心悠然

三

鞠色縑乍開柿葉書亦滿瑯琊藉稻名知在第幾卷

四

君方沐東墅我將乞官湖前崖添蒲橋後廟祠柳姑

五

春坊且裁詩秋樹勿負米功成有時還讀書何日已

題燕巢藏書圖

弃書繁書巢有若入幕燕日穴紙絮間涎涎鎮相戀

二

設庫自羞養挿架儼壘封豈如宛委書但置巾箱中

題畫

峰迴碧雲合澗落蒼松寒何處携素琴高山流水間

題畫

碧樹分礪東青山翳雲外江閣連草亭此中有人在

題畫扇

春風野田花青紫碧紅白蜨蝶雙雙來與之比顏色

題屏間畫蟬

負綫入深林翳葉不能蔽吁噲墜露間喑喑作秋思

伊勒兔親王召見賜飯賦謝二首

國邸苴封早平臺賜召遲虛啣梁孝酒不誦楚王詩

二

柳賦抽殘簡芹絲擷上尊身慚戴安道飽食在王門

題同年喬編修桃花汎舟畫像五首

漫水綠溪漲桃花照眼新誰將蓬海客圖作武陵人

二

紅糝落芰衣青菰冒蘭漿但從魚港遊莫作蟻陂想

三

樹裏茅堂遠船頭酒甕虛一編橫膝上猶是禁中書

四

借沐逢花雨尋春向柳塘最憐機棹者家在射湖傍

五

蹊草綠似裙山雲白如絮若過大夫橋同訪志和去

題採蓮圖

雙雙採蓮船並返芙蓉湖大姑擲蓮子小姑弄舒鳬

二

烏帽窺岸側紅裙濕舳邊拋蓮有人覺弄鴨祇自憐

金生索題畫像名秋林詩思圖

南國新詩好西京舊姓傳秋林閑坐處吾意亦悠然

題太倉王奉常畫石

泗上興雲晚潼山帶雨初醉中看不極何必在中書

二

誰呼鬱林船取之落星渡我欲問斯圖君平在何處

題青門五真圖五首

展卷

金桐遠相披鐵摘坐堪展誰道僕射書祇讀十二卷

課耕

烏犍去前坂白鷺下晴川睹此碧柳下何似青門前

游嶽

宗子愛五嶽畫之同卧起那知觀嶽人亦復在畫裏

垂竿

龍額不可居羊裘渺相望著書西塞間投轄東海上

蕉團

裴楷三毛勝稽康四字難相看俱有會只在此蕉團

世說云覺
神明殊勝

過易亭

吾愛楊公子相尋過易亭盤間菰菜綠池上柳條青

晉安藍漣自畫竹影兼題詩持示為書其後

綠竹不蔓生猗猗滿江沚誰知子敬來尋在月明裏

二

藍生善畫竹羞學管仲姬不解落筆妙請看題詩時

何生讀書雙桐軒

面白不傅粉日長能讀書雙桐生井上長覆讀書廬

二

百尺曾無路梅花尚有香

百尺梅花皆何氏樓名

高樓讀書處不

見舊何郎

予遲暮歸里徐二咸清命其女昭華師予飲予

傳是齋酒半請試予喜其畫蝶即以命題
華拈筆立成詩曰蛺蝶翻飛去翩跹綵筆中
雖然圖畫裏渾似覓花叢因和其韻

滕王有遺譜描之深閨中羞煞東園蝶翩翩滿綠叢
續畫蝶詩

為倣徐熙蝶閨中畫隔牕牕前花蛺蝶子飛撲類雙雙

二

謝女本吟絮比來兼畫蝶點黛作翅花塗粉上衣葉

三

繡帖拈花譜香螺撲畫欄莊生雖老去如向夢中看

集叅壽堂觀多羅惠王書額

玉版垂鈎勁金枝倒薤清書成為善字令我思東平

二

賢王妙圖書睿翰布金石一見龍鳳文羞探蟲鳥跡

秋日假沐慈仁寺聽王生琵琶

秋風來上苑落日登高臺誰作婆羅曲江東曹善才

二

杜曲看花晚，慈恩載酒遲。
宜春高弟子，尚在市樓西。

入湖堤口號

高柳絆游竿，濕草沾墜釵。
江南梅子熟，湖上風雨來。

二

入湖逢三梅，閑寺坐半月。
青堤一條長，綠水兩面闊。

寓言七首

何處丹唇女，行來白紵衣。
雲陽西去路，恐是華山畿。

二

未唱江都樂先逢吳絳仙
鏤金雙櫺子一駐柳州邊

三

藥塢經行苦高唐藉夢成
徒懷甄后枕不解枕中情

四

白石投寒水紅顏組
亭裳客衣曾綻補梁燕語難忘

五

翠帳朝雲動瑤臺
春雨寒草生磐石合先遣侍兒看

六

喜着羊欣練甘烹龍塞魚閒來無所索只索數行書

七

一作遲同行不至

碧玉啼難忍青霄望未來木棲牀不穩一坐五徘徊

石明府以小像請題

素襟欲披風碧葉方藉地持杯弄清泠俯仰有深意

二

捧檄結雙鳥將至龍門山如何謝幼與寫置巖石間

三星圖

綵鳳名將起青麟紱乍留比來仙侶會相結在瀛洲

二

何地尋蓬島分明見畫圖三星同照處其一是南弧

題朱拜石司理記年圖

長松鬱塞我下有清流泉君子秉高躅抱膝以偃然

二

白石礪齒疎丹砂駐顏好投杖還深林趺坐藉芳草

三

太末佳山水攬轡曾司刑朝看藐姑雨夕飲薌溪冰

四

廬山金輪僧相顧說罔象側身瀑布傍何如此圖上

五

我來值暮春宿君東南軒開軒展斯圖宛坐花樹間

題蔡鍊師畫像

白玉垂紫絛黃金躍丹鼎成都老畫工親見手摩影

二

法果人難老仙桃山有名

鍊師所居山

他年留畫處應在岳

陽城

吳晉畫像

夫君本佳士濯濯冰霜姿何處傳幽思秋林獨坐時

二

黃葉翻白雲清神映寒水我來頻見君如此畫圖裏

迎鑾曲十章

夏后重巡日虞庭肆狩年省方行縣寓望幸遍山川

其二

羽騎鈴鸞減帷宮柱杻稀穿膝移左蹕避路解前駢

其三

捷石觀河遠鞭虹渡海長但能開馬頰何用詠宣房

其四

旭日驅龍輅春風布鳥田吳疆連越嶠西至怨東先

其五

蠲租同海谷復賦遍江淮不是

君王至何由補助來

其六

雲蓋連星羅草茵襯花織造舟當六龍江水共一色

其七

翠華將南臨含齒齊望幸神魚泳中江麒麟產旁郡

是年正月海門神魚至
二月餘姚縣民家產麟

其八

滾滾甘露降習習四靈至況茲姚姒鄉舜禹所巡地

其九

一人自遊豫萬姓齊樂歡江東皓首翁扶杖咸來觀

其十

戴德望

堯轍感恩樹嵩碑微臣職紀實製此迎鑾辭

西河集卷一百四十八